

Lideri međunarodne zajednice osuđuju kršenje imovinskih zakona od strane političkih grupa

Visoki predstavnik Wolfgang Petritsch, OSCE ambasador za BiH Robert Beecroft, UNHCR Šef Misije za BiH Werner Blatter, Specijalni predstavnik UN Generalnog sekretara Jacques—Paul Klein i Izvršni oficir Komisije za povrat imovine izbjeglih i raseljenih lica Steven Segal udružili su se u osudi politički motiviranih pokušaja ratnih veterana i sličnih grupa da odlože zakonske deložacije, a što potkopava vladavinu zakona širom Bosne i Hercegovine.

Brojne političke grupe koje vrše pritisak, naročito ratni veterani i neka udruženja raseljenih lica, krše imovinske zakone zahtijevajući da nezakonski ostanu stambenim jedinicama koje pripadaju nekim drugima, ili zahtijevaju da im se besplatno daje zemlja ili izgrade stanovi. Zapravo, mnogi od ovih ljudi već su ušli u posjed svoje prijeratne imovine i domova ili su završili rekonstrukciju iz fondova međunarodne zajednice. Međutim, mnogi javni zvaničnici popuštaju takvim zahtijevima, ili, što je još gore, aktivno ih ohrabruju. Kada takvi zahtijevi ne mogu biti ispunjeni, ove grupe prijete ili fizički napadaju radnike službi za stambena pitanja, koji pokušavaju obavljati svoje zakonske dužnosti. Javni zvaničnici širom Bosne i Hercegovine ne samo da nisu osudili ovakvo nasilje, nego nisu uspjeli ni krivično goniti počinioce.

Implementacija imovinskih zakona je ključni test sposobnosti Bosne i Hercegovine da se drži vladavine zakona. Ako javni zvaničnici žele vidjeti Bosnu i Hercegovinu dijelom ujedinjene Evrope, jedini put ka tome je stroga i potpuna implementacija imovinskih zakona. Primjećujemo da mnogi od tih istih javnih dužnosnika koji djeluju u korist grupa koje vrše pritisak još uvijek nisu poduzeli ni minimalne korake ka obezbjeđivanju zadovoljavajuće budžetske podrške alternativnom smještaju. Ukoliko bosanski javni zvaničnici nastave kršiti imovinska prava zbož kratkotrajne vlastite dobrobiti, jasno je da oni udaljavaju BiH od Evrope. Zreli politički lideri se ne plaše poduzeti teške ali neophodne zadatke, kao što je implementacija imovinskih zakona, i pri tome obavještavati glasače o svome radu. Očekujemo od javnih zvaničnika trenutno na svim nivoima vlasti da djeluju u skladu s tim.